

'Penjawat awam dapat gaji seperti biasa, tak perlu moratorium pinjaman rumah'

Malaysiakini

20 April 2020

Hidir Reduan Abdul Rashid

Penjawat awam menerima gaji seperti biasa dalam tempoh perintah kawalan pergerakan (PKP), justeru mereka masih perlu membayar pinjaman perumahan dari Lembaga Pembiayaan Perumahan Sektor Awam (LPPSA), kata Menteri Kanan Ismail Sabri Yaakob.

Beliau menambah bahawa penjawat awam juga mendapat insentif RM500 bagi Gred 56 dan ke bawah.

"Tentang pinjaman rumah kerajaan, telah diumumkan dan dijawab oleh kerajaan. Kakitangan kerajaan masih terima gaji macam biasa, yang tak terima gaji peniaga kecil seperti penjual goreng pisang.

"Kerana mereka (peniaga kecil) tak boleh buka perniagaan, mereka dapat bantuan geran," katanya pada sidang media harian di Putrajaya hari ini.

Pada 9 April, dilaporkan bahawa Kongres Kesatuan Pekerja-pekerja di dalam Perkhidmatan Awam Malaysia (Cuepacs) menggesa kerajaan menawarkan penangguhan tiga bulan atas pinjaman perumahan yang diambil oleh penjawat awam melalui LPPSA.

Pada 8 April, LPPSA memaklumkan tidak akan memberi moratorium pembayaran pinjaman bulanan untuk penjawat awam kerana kebajikan mereka dijaga.

Copyright © 1999-2012 Mkini Dotcom Sdn. Bhd

Source: <https://www.malysiakini.com/news/521603>